



UNIVERSITÄTS-  
BIBLIOTHEK  
PADERBORN

## **Arbor Vitæ Sive Vita Et Doctrina Christi**

Ex Quatuor Evangeliiis In Meditationes Quotidianas Velvti Totidem Ramos  
Distributa

**Illsung, Jakob**

**Dilingæ, 1693**

Meditatio CCCXII. Crux Christi sectatoribus quotidie tollenda.

---

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)

## MEDITATIO CCCXII.

*Cruce Christi sectatoribus quotidie  
tollenda.*

Matth. 16. v. 24. Marc. 8. v. 34. Luc. 9. v. 23.

**PUNCTUM I.** *Tunc JESVS dixit Discipulis suis* (nempe postquam, quis esset, & quid tamen passurus esset, quàmque vehementer pati desideraret, ipsis sufficienter declaraverat) *Si quis vult post me venire, abneget semetipsum, & tollat crucem suam, & sequatur me.* Quamvis autem hæc Discipulis principaliter dixerit, utpote, qui ex instituto profitentur Sequelam Christi; non tamen dixit his solis: nam S. Marcus ait: *Et convocatâ turbâ cum Discipulis suis, dixit eis.* Et S. Lucas: *Dicebat autem ad omnes* (quis ergo solus vellet excipi?) *Si quis vult post me venire, abneget semetipsum, & tollat crucem suam quotidie* (Nulla enim dies vacat sua cruce, & quotidie aliquid pati debemus) *Et sequatur me.* Videri poterat Optimus & Suavissimus Magister suis Discipulis valde arduam & asperam lectionem præscripsisse; sed considera, quomodo eam leniverit. Dixit 1. *Si quis vult* (non cogit, sed invitat) *post me venire* (præeundo per Exemplum suum suaviter trahit) dixit 2. *Abneget semetipsum.* Nempe ita seipsum tractet, & perversæ suæ voluntati ita in omnibus repugnet, quasi ipse non esset ipse, sed alius, cui adversaretur. Sed hoc ipsum est non tantum abnegare, sed verè exuere veterem hominem, & Novum, imò Christum ipsum induere: ut verè dicere possis cum S. Paulo ad Gal. 2. v. 20. *Vivo autem jam non ego: vivit verò in me Christus.*

*Christus.* Quàm exiguum ergo est id, quod abnegas & quod perdis! Quàm æstimandum autem & appetendum est id, quod exquiris, & quod hac tuâ ipsius mutatione lucraris! Dixit 3. *Tollat crucem suam quotidie, quam scilicet DEVS ipse juxta cujusque vires sapientissimè, providentissimè, & amantissimè divisit, selegit, imposuit, & ferre juvat.* Addiditque: *Sequitur me, Exemplo præeuntem, Cruci me affigi finentem, ab ea, frustra Judæis omnibus me sollicitantibus, & provocantibus, minimè descendentem, sed morientem in illa.*

PUNCT. II. Considera, quanta sit necessitas, & quanta utilitas seipsum abnegandi, & crucem suam portandi: dicit enim Christus: *Amen, amen dico Vobis, nisi granum frumenti cadens in terram mortuum fuerit; ipsum solum manet: si autem mortuum fuerit, multum fructum affert.* Joan. 12. v. 24. *Qui enim voluerit animam suam salvam facere, perdet eam: qui autem perdiderit animam suam propter me, inveniet eam.* Matth. 16. v. 25. *Filius enim hominis venturus est in Gloria Patris sui cum Angelis suis, & tunc reddet unicuique secundum opera ejus: nempe secundum mensuram bonorum, quæ egit, & malorum, quæ pertulit continua crucis portatione.*

PUNCT. III. Considera, quantum & quàm irreparabile sit damnum, volentis Animam suam Salvam facere, sive liberam à suâ Abnegatione, ac crucis portatione, adeoque perdere eam. Iterum enim ipse Christus dicit: *Quid enim prodest homini, si mundum universum lucretur, Animæ verò suæ detrimentum patiatur? aut quam dabit homo commutationem pro Anima sua?* Matth. v. 26. Audi itaque S. Augustinum Tract. 51. in Joannem: *Magna & mira sententia, quemadmodam*

fit hominis in Animam suam amor, ut pereat; odium, ne pereat. Si malè amaveris, tunc odisti: si bene oderis, tunc amasti. Felices, qui oderunt custodiendo, ne perdant amando.

## MEDITATIO CCCXIII.

### De Transfiguratione Christi.

Matth. 17. v. 1. Marc. 9. v. 1. Luc. 9. v. 28.

**PUNCTUM I.** Quia Christus Discipulos suos ad abnegationem sui & portationem crucis adhortatus fuerat promissione Cælestis Gloriæ aliquando percipiendæ, & à quibusdam etiam in hac vita prælibandæ; dixerat enim apud Matth. c. 16. v. ult. *Amen dico vobis, sunt quidam de his stantibus, qui non gustabunt mortem, donec videant Filium Hominis venientem in Regno suo*; ideo *Post dies sex* (non computatis diebus, quo hoc dixerat, & quo hoc impleverat, quos S. Lucas computabat, & proinde dicebat: *Factum est autem post hæc verba ferè dies octo*) *assumit JESVS Petrum, & Jacobum, & Joannem fratrem ejus, & ducit illos in montem excelsum seorsum* (qui communiter censetur fuisse mons Thabor in Galilæa, ex quo descendens ipse, & Discipuli, teste Marco c. 9. v. 29. *Prætergredebantur, id est, perambulabant reliquam Galilæam, donec venerunt Capharnaum*) *Et transfiguratus est ante eos.* Matth. 17. v. 1. Considera, Christum non omnes Discipulos, sed tantum illos tres duxisse in montem Thabor, quos secum assumpturus erat ad montem Oliveti: ut ostenderet, visiones, prægustationes Gaudiorum Cælestium, & Solatia Spiritualia, non omnibus Servis DEI communicari, sed illis, quibus vult, quando vult,